

寄庵詩文鈔

寄庵詩鈔序

詩有詩之教焉有詩之學焉詩之教備於三百其學之
之法則聖人言之詳矣思無邪學之本也授以政能達
使於四方能專對學之用也興觀羣怨事父事君而多
識學之益備是矣七十子之徒皆以是學而無一人有
傳詩漢之世有傳詩矣不必其人傳也有傳人矣未嘗
有集傳也魏晉以下則有專集有總集唐宋及今作者
益廣而工者愈多世見其人可以是傳也慕之篤則學
之也專辨其科品第其高下索諸神解妙悟徹終身之

精力以求之論詩者之言與作詩者之言爲書至繁多不可勝窮然而聖人所以言學者不求也學者所深求聖人未言也是其千秋離合同異正學者所當深思矣苟庵先生有詩若干篇鈔爲一書使象津序之先生於詩第寄焉爾津則直不能詩其源流何人系出何家不能明也於大家名家正宗接武當在何品亦不能知也而先生詩之有本則實能知之先生行已敬恕而居官廉慈是其情性然也披其詩有歡愉之音焉有悌鬱之音焉其所愉愉其與所性合者也所悌悌其與所性違

者也或達言之或切言之或寄托言之不越斯旨矣惟其所學以聖人之教爲本而有其情性故其爲詩或憂或樂又足以爲教也嘗謂千百世不能無人千百世人不能無性情卽千百世不能無詩然而筆墨言語之工如異蝶金粉奇鳥宮商非不美也何與聖人之道天下事弊窮則必有所變變窮則必有所返禮弊於周賦弊於漢四六弊於齊梁陳隋八股弊於今日皆失其本而苦其繁且多也惟詩之流最遠然如今世人所求作者論者已不可窮上下計之不及三百年當必有所返

矣奚假三百年更百年後必有豫見其端而顯識其勢
者始信斯言之不謬然後真知先生之詩之所以可傳
以其人非世之詩人故其爲詩非世人之詩也嘉慶癸
亥三月六日濟南新城張象津序

古詩三百篇大道備風雅末俗棄詩教小言笑嵬瑣指
歸示麗則迷塗戒淫冶漢魏盛文章齊梁空土苴平生
談執家韓子言非頗振衰起李杜曲高和弥寡自茲迄
宋明才智亦良夥格律與意興關一復不可亦知竟陵
輕何必空同假謗傷聽羣兒袒呂毋乃左文獻徵西南
張含李元陽聲已夏吾師今昌黎有名在天下詩書為
麴蘖性情自陶寫得味殊酸鹹絕學堅負荷或古如莖
英或典如蘖竿粹如揀金沙華如佩玉儼神光電睽睽
竒采星侈哆溟滓入飛動章句極貼妥譬諸江漢流餘

皇駕高舸元氣為之舟動搖微風拖河源問星宿狂瀾
障沍施絳帷示環編題辭爰命我崇山仰門牆傳薪媿
燭火西風卷簾旌秋色淨蕭灑天空涼月明花落夜燈
炮讀久更漏寐再三不能捨昔聞宋楊時粹言實緝補
叶聽講席皐比雪深侍瞑坐又聞唐李漢師說勸勿墮
舊本識韓文奕載相傳播太華山宇高昆明水波瀉哲
人同古今俗子但么麼不朽信立言義娥煥嫫姬何以
贊高深釣天奏廣野

門人戴恩詔呈稿

寄菴詩鈔

一卷古今體詩八十七首

二卷古今體詩五十九首

三卷古今體詩四十八首

四卷古今體詩四十八首

五卷古今體詩一百二十一首

六卷古今體詩六十三首

七卷古今體詩一百三首

八卷古今體詩五十一首

共五百八十首

劉青天傳

劉青天者名大紳字寄菴滇之寧州人以乾隆壬辰仕
吾東吾東服其德稱爲劉青天云初令曹單二縣二縣
固吾東財賦鄉公旣至民無羨稅大吏過境至不能搞
從者大吏檄公代長山令漕將以困公民聞公至坦負
相屬於路不數日漕畢又檄公令新城又檄公攝朝城
築舊令有疑獄公未能決以是劾公候部議公善書又
長於詩是時待罪厯下邑人聞公將去求書者盈門公
日爲書墨數斗紙數百暇則與士大夫泊舟湖際鵲華

山色遠映水面菱荷蘆港漁歌欸乃胸中浩然恬適之
 趣盡寓之於詩初不知身之將遣也及部議下當流公
 卽日就道曹單民醵金饋驢公辭委之車中行過某地
 河決公盡用以濟溺民未及流所新城曹單民復醵金
 贖公還嘉慶間河南撫陳公大文移鎮東來舉廢吏之
 賢者公爲首公至陳以憂去新撫授公冠縣冠多逋賦
 公下車月餘復詣省垣辭職父老隨之請公回公謂父
 老曰父母無不愛子子或違教如父母何父老頓首謝
 乃允其請土豪某積賦不奉命公以巡稼過其里招之

某曰爾適無錢耶曰然則代爲償之至秋復使人謂之
曰爾又無錢耶曰然復與衣代償之某感愧終身無欠
賦公在東久知終不合於時欲棄官去大吏舉公卓異
遷武定軍廳因以疾辭士民送者兩泣皆呼青天

論曰己未庚申間先君以候補教諭歸次省垣與公相
相契先君問公施何德於民而民情如是公笑而不答
臨別贈先君草書十二幅寄林詩稿一函草書潑墨淋
漓至今猶新余讀寄林詩又詩曰刺有兒童壓歲錢嗚
呼有以也夫

山東劉鴻翱次白

寄庵詩鈔一

寧州劉大紳

瓊漿

東山一石罇濶五寸餘深六倍之有水旱澇不
涸溢以瓢側酌之隨取隨盈余八萃雲山道經
過訪而飲之其味清冽殆如上池之水非人間
中冷泉輩可比也因錫以名曰瓊漿暇日爲賦
短歌一章

世上多名山我獨萃雲去中道偶然渴隨與瓊漿遇以

手掬在口味乃如甘露祇恐後來人欲飲不知處

答客問山中

曾爲山中客記得山中路曲折清溪間轉入雲深處門
前有桃花屋後有梅樹今日梅花落君看桃花去

新田山房

山中一夜眠衾冷幾回寤不是春猶寒人間清絕處

獨坐

靜如退院僧巾履散不著樹影移空階蟬聲止復作微
風動疎簾殘雲度高閣所思適不來杯酒聊獨酌

菊影

斗室餘叢菊經冬尙未殘半窻孤月淡四壁一燈寒愛
此花無敵能如影亦難似將陶處士移向畫圖看

還山

春風一病得歸山北馬南船計日還滿載圖書珍土物
相依琴鶴破愁顏長途旅館從容睡細字官衙任意刪
畱得本來真面目清風明月袖孌孌

秋谷因園

泰山東下到高樓樓上人非第二流絢爛大名爭附熱

蕭條深谷自悲秋，當軒尺水魚龍遠。
繞屋層巒薜荔稠，幾卷飴山詩集在。
光芒夜夜燭滄洲。

上女郎山

山爲玉陽子得道處有
李中麓施愚山題詠

東行無所適，且上女郎山。
詞客曾吟處，仙人此閉關。
殿高松子碧，殿古薜花斑。
半日堪游衍，何須出世間。

晨訪王子文秋水亭

朝烟上石橋，宿雲停高樹。
一夜不見君，凌晨到君處。
在秋水亭詩如輞川，墅南望有商山相約採芝去。

晚歸

尙嫌歸興早緩步更清歌北去秋山盡西來返照多牛
羊前嶺下鳥雀遠林過莫訝投村晚登臨復幾何

登撫山樓

舉足凌高樓天風相蕩佚逡巡垂二分陋彼雙股栗下
視層山巔飛鳥籠際出方知塵寰中有如處褊虱達士
能曠觀不徒閉幽室浩歌頻搔首長吟亦抱膝天上自
有人問之語終密

騎驢

一秋車馬倦驢背趁斜陽短草經蹄淺高風掠耳長行

遲詩已就路近醉何妨況是鄉村外不逢京兆郎

和王子文見憶

乍得相逢酒半溫旋聞父老已迎門蕭蕭野徑無三里
淡淡斜陽又一村湖水烟寒行鼓棹籬花秋老且停轅
詩人悵望登臨處無數飛鴉下曠原

由呂家埠至滑溝舟中作

細細烟中沙渚微深深水底鯉魚肥一羣花鴨知人意
不背船頭各自飛

贈于滄巖

當歌仰視霜月寒誰道人間行路難五斗功名一石酒
東山才子西江官得失榮枯如逝水老至不歸胡爲爾
却笑七十鬢毛蒼猶爲聞鷄夜半起

格孫城

白日蕩平林寒風振古瓦格孫何代城零落委荒野松
柏餘古邱耕犁及廢社感此多悲懷流水自西下

題李欽符雙檜軒

一檜竦直干烟霄一檜盤鬱離塵囂千林萬樹自零落
雙檜已將百年遙紹興老人八十一習靜中間閉幽室

愛憐不教牛羊傷閱歷任從風霜疾老人自言年少日
庭軒離立如人強老人今老樹亦老大椿未足論短長
直者其材爲世用土侯第宅資樑棟曲者不材能自全
匠石遇之弗見重未識老人意若何年年歲歲相婆娑
莊周肯作欺人語材不材間所獲多

雪

客路殊無賴前村訪戴安輕雲生隴首大雪落簷端深
巷餘車轍清江一釣竿西山空有約登眺阻高寒

留別王子文

已盡湖山興蕭然萬里行於人多有負在汝竟何成
送今宵淚相思異日情歌詩非率爾吾亦愛吾名

賄了
文爲

賦毛詩
數章

伯兄晉庵南歸計程已在漢水舟中矣賦寄

幾向春風折柳枝君歸今日已遲遲遙憐漢水孤舟夜
尙憶南山獨臥時黃鶴樓中漫作賦清溪洞底好吟詩

還家老母如相問爲道平安勿更疑

詩南山
朝磨

數日寒甚憶伯兄晉庵

阿弟南歸時炎炙日如炙阿兄復南歸萋萋草未碧朝

來猶負暄忽驚暮雪積寒氣侵肌膚降階足跼蹐我處
重屋中厚被擁一尺試問孤客舟何能煖片席人生貴
安居胡爲遠作客石田雖無收饑寒亦不迫有母依高
堂東南盼望隔阿弟如早歸庶可慰晨夕我今還後期
阿兄正行役歡樂易以肥悲憂易以瘠亦知憂傷人遣
之實無策美酒沽十千取醉聊自適

宿韓化南習靜軒

邃宇深重重中有習靜處夜半無人聲花香自來去
客單父石完璞孫嵩峰張致祥中敬軒兄弟見過

西望南華是舊遊當年傲吏說莊周
升沈於我如蕉鹿得失從人應馬牛
豈有豐碑仍在口但看矮屋已低頭
諸君一種相思處風雨泥塗倦未休

賦輸棋

忽聽人家唱凱歌紛紛車馬盡蹉跎
傷心一卒勤王意獨自臨危呼渡河

畦山亭晚步懷趙翔漢

畫象畱粉本在此夕陽前籬落明秋水
亭軒送暮蟬沈沈高樹影淡淡小山烟
子固歸何處瞻望舊日船

風雨

已酉六月三十日開窗納涼始散帙忽聞萬馬空中嘶
半天晦暗色如漆電鞭過處雷鼓從雲氣欲墮嵩華峰
頃刻東南大雨注如黃河瀉聲洶洶蛟龍乘勢嘯徒衆
鬼怪神靈互相送前村茅屋捲上天愚民懼伏不敢動
朝來起視天宇清依然禽鳥皆歡聲甘雨慶雲自可樂
無爲震怒驚羣生

晚夏

牙籤玉軸上塵埃老眼朦朧慵更開馴鶴不飛松子落

前村有客抱琴來

千章夏木早涼生
修竹叢中屋數楹
記取蕭蕭今夜雨
芭蕉葉上作秋聲

七夕

填橋鵲羽恨飛遲
天上星辰久別離
畢竟銀河容易渡
一年一次慰相思

秋蝶

回首園林春事非
展鬚垂翅與心違
深深記得穿花見
冉冉驚從落葉飛
蘭不當門香故在
菊猶存徑露初晞

腰肢舊日相憐瘦莫怨秋風褪粉衣

和龐仁表登岱觀日出

半夜天門擁虎罷憑凌絕頂攬雄奇雲排山石氣昏暗
日破海濤光陸離不睨眼空齊曾界如椽筆抹漢唐碑
昔年我亦曾三宿似此高狂未易追

綠玉菊歌

昔有仙人朱孺子采菊玉笥山上頭服之身輕入蓬島
千年重向人間遊手持九節綠玉杖上有瑤函不可求
一朝痛飲黃河曲寒香晚花豁倦眸林園一百四十種

四顧嘆其名盡浮仙人去後杖擲地今年一樹開深秋
短歌微吟正夜半起視霜月當高樓

東臯園晚眺

眺望今何晚山林興不違人從虛市返鳥背夕陽飛迥
野低平楚前峰落翠微無爲羞日暮歸去臥牛衣

劉聲宏贈詩

忽訝雙魚尺素傳夜明珠子走盤圓歸裝此去誇鄉里
又得曹風十一篇

謝袁世符贈板橋畫松

山中野人種松樹跨巖架壑不知數朝看空谷皆龍蛇
夜聽虛簷有風雨板橋何日揮禿毫逕丈其勢參天高
緘滕不放通靈去猶能枕上飛秋濤袁生寶此四十載
朝歌暮舞忘凍餒黃河岸決水滔滔田廬蕩盡喜松在
去年持贈荒城隅似挾畢宏韋偃俱我無杜甫好詩句
縱然神妙空嗟吁載歸張之舊茅屋千林萬樹讓此獨
報詩今已遲年餘偃蹇難於賦衆木

石鷹歌

天陰殺氣滿穹屋野狐竄奔鴿驚伏平原萬里皆秋風

石鷹何年出幽谷頂毛如角喙如鈎雙睛炯炯顧視蕭
深山曠野凡鳥多不飛不鳴意何屬豈是百中羞爭能
天生神武在不黷降躩幾許矜成功盡是卵殼羽毛族
虞人獵馬張弓弦風生火出競馳逐嗚乎石鷹鷹不如
紛紛逞強食弱肉

贈白家僕

詩人酒客盡狂夫有此崩頭赤足無殘雪梅邊如作畫
試添驢後背花奴

水仙花

清泉白石夜凝香
六出亭亭冰雪光
一舫月明人不見
江干無際水茫茫

黃河南岸賦別諸故人

看君南望復傷神
予亦泣痕無舊新
最苦黃河春水淺
烟波不隔送行人

謁禹廟擬題壁

洪河河伯不仁哉
濁浪滔滔不可迴
後代疎虞沈白馬
先人隱痛化黃能
八年底績懸壺過
萬古安流杭葦來
偏是忠臣孤憤在
臨危呼渡自悲哀

朱亥里

朱亥尋常鼓刀人公子好客不爲賓袖中錐出將軍死
眼底早已無強秦至今人弔當日里乃知英雄在屠市
毛錐馮銖胡爲平荆卿提劍過易水

和答諸子汴梁城送別

長亭折柳自嫌疏送過黃河百里餘坐月中宵同聽雁
看碑古寺共騎驢三春花鳥迎歸路兩字平安待報書
南望鄉園今漸近不須天末更愁余

南陽臥龍岡謁武侯祠

晨登南陽廬日入還倚徙
緬懷諸葛君涕泣不能已
躬耕吟梁父直將農夫耳
昭烈三顧之馳驅爲漢死
堂堂出師表丞相行其是
萬古隴畝間惟可莘野儼
今來多荷鋤緊誰真名士

哭沈龍山

一代風流盡千秋亦感傷
斯人原不偶於我最難忘
萬卷歸何所一編聊復藏
龍山新塚合鴉影對斜陽

曉起

曉起月在嶺照見竹間露
山鳥不知寒啼聲出遠樹

寓大新橋僧寺

山僧喜靜默對之如獨處
半日無言說空中有鈴語

遊黃花山寺

羣山力相軋到此亦無爭
樓閣空中出烟雲濶處行細
泉涵曉色老樹作秋聲不待黃花發超然已忘情

過王舍莊弔李滄溟

離華山色峙秋陰白雪高樓不可尋
一代才名爭頗首百年訾議少平心
已無通子愁難盡未嫁樊姬恨轉深
祇惜四溟真國士如何中道棄遺簪

遊龍洞戲題

晝向名山遊日與名山謀夜傍名山宿神與名山逐名山亦喜我輩狂登峰探穴恣飛揚精神意氣發光怪長歌短吟各擅長我聞世上有畫史解衣磅礴得妙理願將我輩五六人置之丹崖翠壑裏九月清寒披羊裘負薪拾金羞名流山麓三間草亭子容我中間賦窮愁秋水詩人露兩肘跣足聳肩不义手宜在夕陽紅葉間右丞襄陽是尙友吾弟吾兒樂何如吾弟雅雅兒魚魚青泉白石登山路貌此兩人騎蹇驢其餘一人囊負背詩

草縱橫納其內一人大匏跨腰間磊磊落落無俗態山
僧或寫禹穴中喃喃毒語咒螫龍幽禽野鳥無彈射飛
鳴宿食狀從容獨有濟南好名士意匠經營何所擬百
尺巖上有高亭氣度襟懷差相似如此一一傳其神今
人或可追古人祇恐丹青無好手橫塗亂抹失天真本
來面目一朝改丈夫鬚眉竟何在不如我記與我詩設
色圖障勝十倍吁嗟我思李龍眠摹得蘇髯並米顛畫
師有數不可遇吾徒胡爲後百年

佛峪

半生愛遊山山靈不我怒禹穴興旣終佛峪意所慕提
携到山巔僧居伴雲住登高嘯秋風倚石觀瀑布勝遊
安可窮神仙杳難遇吁嗟此山中大儒讀書處窮巖有
幽泉一勺涓涓注旁鐫林汲名天壤久已著乃知地與
人相成莫相誤不見鈐山堂過之無人顧以此深自省
行藏安吾素落日山房中第看紅葉樹

謁鐵公祠

鐵公祠畔築高臺夜夜遊人載酒來橫笛短簫空有恨
秋風落日獨生哀艱難已是前朝事險阻終憐濟世才

千古英雄同灑淚湖山好句不須裁

遊歷下亭

一舫曾經此地遊湖光月影共悠悠輕帆短櫂重呼渡
衰柳斜陽又倚樓海右古亭餘敗瓦濟南名士幾荒邱
詩家誰續漁洋社悵望西風水北流

感秋

宿雨寒侵酒力微蘆花空學薄棉飛空山短褐吾將老
多少蒼生未授衣

脫却輕裘付酒家當年意氣亦豪奢山中不養紅鬚面

莫怨霜辰尙著紗

老將

刀瘢隱隱箭痕多
百戰歸來志未磨
若輩封侯如李蔡
當年薦士只蕭何
燈前拔劍星光動
醉後張弦鳥影過
舊騎悞聞金鼓響
據鞍還憶老廉頗

對棋

暑氣收高閣
棋聲出小几
進退無矜心
後先得妙理
厥初幾忘言
悄然但著子
繼乃發長嘯
勢欲拍案起
正如吟詩人
詩成忽狂喜
一局旣已終
寸心復如水
徐徐下

庭階樹影移日晷

白秋海棠

紅紫春深作雨飛
清秋庭院玉人歸
珊珊一副神仙骨
不向風塵卸白衣

懷東臯園舊遊

隱隱星河沒畫欄
美人千里共追歡
三更絲竹催新詠
一載園林住舊官
此日愁思強自慰
他年遠去恨無端
始知情是相忘好
每到深時賦別難

王子文至自都中

三月長安翫物華一朝風雨返輕車問君何事歸來早
秋水亭前看藕花

寄石完璞

餞別青春曉懷思亦已秋風聲來木葉星影入河流種
菊時閒徑抄書不下樓無端聞病臥有托興悠悠

中秋對月

空庭露坐夜生寒落葉飛鴉點畫闌處世亦知人臃腫
離家又見月團圓半生情向愁中寄萬里光分醉後看
一曲霓裳何處聽仙風吹送白雲端

出門

半夜聞鷄鳴孤燈坐待曙開門視天色涼月在庭樹

題徐西溪作一藕一葉二圖

太華峰頭仙路賒君曾衣袖染烟霞携來玉井如船藕
不少亭亭十丈花

九月風霜湖水寒夕陽留客倚闌干采蓮兒女歸船遠
剩有蕭蕭一葉看

菊影

黃花秋晚清於鶴素影宵分寂似僧面壁相看人不寐

書唯淡淡短檠燈

吳耳山過

就臥鐘爲度喧傳有客尋故人驚別久鄉語忘更深落
月辭高樹棲鴉戀舊林羨君歸去好慚愧再來心

除夕

乘除相間已悽然此夕何緣又客邊祀竈一家翻兩地
思鄉萬里只孤懸博來朋友宜春帖剩有兒童壓歲錢
好是明朝堪笑處新年錯認是今年

客至

三年不見故鄉人名刺裁通便可親細說家常過夜半
翻疑消息未全真

求雨歌

上天愛人甚愛雨下民求天直求父匍匐呼號得所怙
天如不雨必天怒下之罪難擢髮數蒼蒼何遽不如古
雨日以十風以五胡爲縱慙如縱虎頃刻濃雲布大字
霽霽萬里無乾土老農扶犁式歌舞嘉禾良苗任携取
不用桔槔治西圃家家吹簫且擊鼓準備羔羊賽田祖
田祖有神不我吐耕牛在野犬在戶我亦分俸築花塢

賦就新詩醉宿酤大笑登壇法士賭咒水禁龍太狂瞽
宿齊河答朱敕人

一醉酣眠到五更牆桑樹底曉鷄鳴臣心慷慨揮戈日
子舍酸辛捧檄情濟水東流終不改至却相驚
秋風秋雨長亭外爲賦從軍壯北行

冀州阻水寄朱敕人

燕山未到已心驚夜半紛紛痛哭聲疑有鬼神沈大地
如將風雨撼荒城居人空自隨流水客子何由整去旌
此際思君無限意浮圖高處雁胥征

中秋後一夜于佛閣看月

中秋夜
無月

向夕新晴賦月宜憑闌水鏡漾淪漪撥開雲霧真空濶
散作烟波更陸離如此高樓能有幾何人良夜不相思
依然萬里清光在莫恨今年望見遲

贈李遊擊

長城萬里固山河塞外封侯志未磨君自將軍宜拔戟
我原儒士亦揮戈琬弓月夜驅豺狗毳帳霜晨載橐駝
聖主恩深無棄物傾囊沽酒且高歌

夢得敬軒

相思踰五載入夢是今宵豈爲生魂遠翻勞死友招投
詩經點竄有句類風騷月落關山暗君歸路亦遙

臘月十五夜對月

城頭勢與遠山平高處先人見月明雪後分光偏皎潔
關前顧影自淒清一年剩有今宵滿萬感都從此際生
隱隱悲笳吹紫塞傷心不獨爲邊聲

入關行

層冰戕戕高插天孤臣已入居庸關午日微茫北風勁
揚鞭大笑無愁顏鼻端氣作白虹吐斯須凝結髭髯間

盛世功高禹績遠我

皇澤厚湯網寬急返滇南告阿母癡兒萬里今生還

贈王蘭畹董竹溪二孝廉

王郎矯矯雲中龍當霄吐氣飛白虹長安人海時自雄
天下健者惟董公跼天踳地羞庸庸高巖巨壑生松風
二子論文非苟同炯然各具雙青瞳新城秀水兩宗工
南施北宋爭雲從四家幾欲千古空後生小子多惛慵

偏將腐草嗤祝融
比如人已登岱峰
我猶侈口談東蒙
吁嗟菲薄真何衷
師門弟子身可終
安能糞壤污鴻蒙
近覩二子開心胸
其光奕奕聲隆隆
人間得此如駟蚤
何當鞭石東海東
相携大醉蓬萊宮
慎無笑我心有蓬
聞蟬

搗衣砧罷劇堪憐
秋柳聲中集暮蟬
幸不榮枯驚末路
偏當哀樂感中年
連宵歷歷聞蛩後
一樹蕭蕭到雁先
莫更撫琴彈別調
征人祇此已悽然

答新城諸先生贈別

此日還鄉夢亦安銷魂不柰別離難山亭人勸雨中酒
野館客加燈下餐帆挂秋風江月冷鞭搖落日驛烟寒
多情盡入相思處歸去何能獨自寬

遊大明湖

湖邊盡說好樓臺湖上飛帆日幾回解識秋風今厭客
船頭不載外人來

不擾沙鷗與錦鱗雲容水態淨無塵後船題扇前船畫
盡是湖中半醉人

山色空青水色藍涪翁瀟酒亦曾諳平生未到江南地

祇信娛人是濟南

落日城頭已半銜涼風颯颯動輕衫繫船仍是亭前樹

昨日詩人少雨帆

時雨帆未至

輕霞捲盡淡烟消歸去雙雙櫓漫搖熱逕不煩新月照
燈前認是鵲華橋

重登泰山道中作

泉響松聲萬壑虛名山得味勝於初因知好境重來處
似讀平生已見書齊魯曾經空眼界星辰此去攬衣裾
嶺前不用頻回馬盤道逍遙興有餘

中秋夜止野店中

祇此中秋月悽然萬里情故鄉同一望遠道獨三更何
況無家釀兼之念友生陰蟲偏切切似與觸悲鳴

重至東臯園

一路秋風柿葉肥泥塗不厭濕人衣曾經謫戍翻如寵
亦只來遊却似歸猿鶴馴時魂夢穩主賓忘處應酬稀
高春尙許幽齋臥門外烏鴉作陣飛

留別曹縣諸故人

村村投轄見交情遊興無端昨夜生灤水牛潭通曉苑

華山一角上秋城高樓晚笛憑欄聽古寺殘雲襯地行
待入平陵流寓傳循良此地舊遺名

借車引

羣公揚揚策駿馬見我城門不肯下崔生聞之時憮然
君今老矣何爲者我車旣輕我馬肥我御手與心不違
泰山之陽汶水下秋風落日如颿飛朝余汶水夕梁父
迴翔鴻雁日當午半年破帽騎蹇驢一時軒豁見眉宇
道旁不少徒行人羨我遲暮停雙輪此車若得千百兩
豈有失路悲風塵吁嗟乎馮謹客上舍彈鋏不淒涼况

君意氣薄孟嘗千金傾囊直糞土萬里故人歸故鄉故
鄉天南最高處駟馬馳驅未能度老人百歲不識車偶
展左圖駭相顧自慚無才今有斯此行儘可誇小兒執
綏且爲借車引借車之圖蓋圖之

贖歸引

出關何年無入關亦時有誰知七品郎官歸贖自兩縣
百姓手官視百姓如仇讐百姓視官豈父母云何兩縣
風氣殊謫戍其官引爲咎或咀於社或祝神或聚而哭
或狂走或欲慷慨三公陳或欲匍匐九閭叩其小人也

必歸公公不卽歸我顏厚其君子曰必歸公公之歸也
義不苟方今 天子真聖人仁慈聰明本天牖公有

祖母年及耄公有母氏亦多壽若公之子以情聞公不
當歸衆人後錢贖之說古有之 國典公誼兩無負

龜卜筮卜吉同衆乃唯唯不否否青錢早信輸乞兒
白璧不煩待良友風霜奔走皮膚皴道路哀號面目醜
萬千人心同一心長安市上嘆未有春風策馬居庸還
關內依依曳楊柳繪圖題句盈篋多其榮乃與使相耦
回首一官值幾何天之玉成意非偶於今歸來月八九

處處家家進鷄酒深閨兒女無所知往事言之尙疾首
自愧無德何以堪作此詩焉志永久誰與兩縣新城曹
誰與贖者一窮叟

王鏡止邀飲漪園

夙負名園諾今從好友過門前流水細樓上夕陽多酒
望新提曳詩人舊嘯歌百年悲往事不醉復如何

園舊爲漁

洋漫亭聖輿子
青諸人觴詠地

試濯纓泉

七十二泉水酌來多腐陳如斯方至味不解定粗人妙

在田時美全從澹處真未妨烹茗苦耕祇用慎勞薪

寄庵詩鈔二

丙辰丁巳

寧州劉大紳

臨河畱別

未盡離亭酒飛帆又渡河相思似春水有恨托微波

韋映輝送至漢口臨別賦詩

河水揚帆疾隼如悠悠漢廣久躊躇滿船風雨兵戈後
二月饑寒患難餘報友頻看新鑄劍累人積恨舊藏書
南來聞有平安信歸語諸君得遂初

白雲洞

鶴背笙簧隔嶺聞，峰頭靉靄杳難分。
朝來恐礙看山眼，已借天風捲白雲。

玉泉山寺夜坐

暫共幽人此閉關，月光冉冉出林間。
不知今夜寒潭水，流到山前第幾灣。

追和萬飛泉

醉舞草堂時憶山，山中甚樂況生還。
同知六國黃金印，輸與萊衣五色斑。

今雨門前不昔如，相思重檢舊時書。
天邊一片飛鴻影，

尙逐秋風到草廬

贈徐南村太守

皂蓋朱幡郡大夫南來此地暫分符始知儒雅風猶古
不信循良道竟孤鶴籠開遲花爛漫印床封久篆模糊
焚香滌硯皆公事爲問門前有客無

閑居

朝暮壘鹽莫漫嗟不妨長作老農家山妻亦是安貧婦
自荷長鋤學種瓜

出遊

百年過已半
筇屐老閑身
止水清留客
空山響應人
仙輪雞犬捷
歌讓牧樵真
日暮天將雨
歸妨墊角巾

友人招飲慈光寺

好友相招不待秋
萬松深處共登樓
病無捷足山疑遠
老有閑情地轉幽
雲氣欲沈花影碎
風聲初歇鳥音柔
情深又訂重來約
滿院天香一袖收

偶吟

游蜂戲蝶散花枝
枝上清陰午漸移
飲酒易悲成老境
讀書欲睡近兒時
窮愁骨相封侯遠
疎懶心情謝客宜

治世久寬文字禁不知何事減吟詩

挽汪茂源二首

木床蒲席臥癯儒久病人皆笑大愚貧是命仇醫不問
德非身累鬼相呼中郎有女同憐小伯道無兒自恨孤
曾讀莊生齊物論悅生惡死豈吾徒

垂死尙爲三日約更生欲結百年隣藥無參朮空相饋
歌異瓊瑰只湧陳殉塋難忘仙籍共蓋棺任受俗儒嗔
人間天上差相似幾帝容君作外臣

勿軒座上短歌

勿軒飲我酒我爲勿軒歌來日苦少去日多天生我輩
將若何我欲東去問羲和魯陽胡爲揮長戈又欲西來
問青鳥王母底事髮皤皤封豕長蛇已可厭蠻觸尙爾
仇則那請看北邙冢纍纍生前車馬誰復過有酒且共
故人飲花閒月下相婆娑月圓不四五花開莫蹉跎此
生安得長年少軍政行酒聽君苛但願醉中舌不出長
教醉後顏微酡漢高是天子人甘受網羅灌夫爲廢侯
一罵盡怒訶何況眼前儘堪白不如屢舞任傴僂勿軒
顧我飲且笑床頭早已空白醪百年歲月真如梭白日

餘光欲盡處溪邊耿耿看纖阿

荒園對菊

種菊以不脫葉爲佳
今秋雨多葉盡脫矣

病臥城中似空谷偃蹇尙餘宅邊菊秋風落落秋雨多
不是幽人不入目典衣薄暮治酒尊醉見月落黃金盆
縱教枝葉都芟盡未妨大節歸然存春花近人秋花遠
別有胸懷自繾綣莫與皮相論妍媸歌鳳狂客去恨晚
五言勗張金門

對酒避俗客栽花嫉惡草吾子能讀書憂憂自獨造惜
哉無古今一例欲推倒當其氣所激怒罵如罪討剪滅

就朝食男兒素所抱人世聾瞶多誰復辨醜好是非太
分明毋乃取煩惱我亦癡狂人舉觴望晴昊未信鱗甲
平不敢雌黃早默默天地間養生固有道子且飲醇醪
萬感盡從掃春蘭秋菊間吾與子終老

八月十七夜對月

明月勸汝一杯酒今夕清光如昨不人生相對須盡歡
誰肯金樽暫釋手邇來戶小羞對人倒吐車茵亦時有
生希甕側容酣眠死願陶前得速朽况此露白風清時
河漢無聲失星斗如何不飲令人悲坐看西山玉兔走

乘醉欲上廣寒宮
逕問當年后羿婦
可能餘藥畱贈人
願乞一丸爲我壽

籬間遲同人小飲未至以詩速之

客在仙山第幾峰
黃花今已寫秋容
如何隔戶筇聲寂
祇見當軒樹影重
酒味原如交味淡
詩情却比宦情濃
市虛漸少人來往
莫待城頭起暮鐘

重陽風雨

幾度重陽赴客愁
今年好作萬松遊
長橋短柳斜陽路
古寺寒蟬落葉秋
不負雲山宜仗酒
誰知風雨罷登樓

黃花采盡空惆悵佳節從來未易酬

張金門種田

治生無上策垂老種官田
貓虎從人祭雨暘於爾愆
論交衰柳外望古夕陽邊
昨日催租吏盈門橫索錢

憶萃雲山中

仙源近在此城東問道重重有逕通
古刹白雲山色外孤村黃葉樹聲中
聽泉倚戶時逢雨醒酒凭牕自受風
痛哭西州今五載半雲不是爲途窮

題董勿軒詩稿後

世上詩人那有此落筆千言頃刻耳橫摧五岳如鄧陵
倒瀉銀河一杯水氣力雄健誰可當大兒老杜小兒李
眼中久已無古人何暇紛紛問俗子造物於人固有情
所予不過以糠粃精華一旦付與君不珍秘之恐非是
不見人奴望封侯東野窮愁長吉死且將跼蹐公卿間
莫據抗言天下士

望萬松山懷王聚洲先生和董勿軒

草亭於松山相間一瓜水登臨亦已疲睠懷在彼美當
日王先生讀書實於此繼冠惠文冠旦夕彈奸宄直聲

在天下
巖言出鄉里我昔方
籍人而肯汙國史
奄人未得志公已
瀕九死有明三百
年吾州一人耳後
起者爲誰其在子
董子

答董勿軒招飲之作

有馬烏啄瘡搖尾尾不起
歎見龍文駒上坂如平坻
低頭自歎息隨行未能爾
龍駒迴顧之相憐復相喜
耕田願並駕騁途願結軌
一宵各阜樞班鳴聲不已
人類賤衰朽古道今無矣
舊雨旣多悲谷風亦厚泚
豈知龍駒心不願獨千里
殷勤鷄黍約嗟哉吾董子

雙琴山房歌酬董勿軒

一琴冷落無七絃聲在指上不能傳一琴典却古錦囊
中宵凍裂時自傷秋聲昨夜到庭樹美人並坐彈清商
一彈再彈百靈集剛風雷雨妖魅藏梧桐葉下聲激昂
抱琴置酒酌其旁舍旃幘棘與折楊有琴未肯應侯王
有梧終當棲鳳凰世人何嘗無知己維琴與梧吾與子
過悟一草亭讀勿軒近作

交遊漸疎濶出門輒獨往叩欵柴荆間千古相下上大
壑生雄風深林發遠響古人不可作來者誰爲賞

過孫鳳藻新莊

不入深山裏豈能無客過
白雲前嶺盡紅葉隔村多
瘦馬依平野蒼鷹下廣阿
交遊漸衰老與子且高歌

十月十日得何勳臣山東來書作詩報之

東南相去八千里夢中徃徃見吾子
吾子氣度超且雄當日原嘗未有此
昔我遠出居庸關風沙慘淡凋朱顏
丈夫呼號婦女泣一朝傲吏看生還
明湖秋風鵲華雨從子問交半齊魯
晝與高李論雄文夜共孫吳談大武
自從折柳固山頭揚鞭挂席思悠悠
大別山前漢陽樹

黃鶴樓外鸚鵡洲，纍纍橐橐壓船背。破研猶存古書在，
強弓毒矢未肯加盜賊。還能恕我輩，此身得向南雲歸。
家慶共著老萊衣，藉樹軒前客何在。抱孫樓下人亦稀，
去歲重陽有雁至。尺素十行委曲備，不是無閒作報書。
江上鯉魚遠難寄，醉中草草題數詩。春風正試燈火時，
今午開緘讀未竟。笑我疎狂真不宜，願因吾子告父老。
一家骨肉幸完好，我昔差肥今差癯。酒亦能酣飯能飽，
所恨豺虎荒村多。愚民無地張網羅，食盡牛羊到雞犬。
天不生駁將奈何，嗚呼吾今真老矣。匡濟平時大言耳，

豐年不釋桑梓憂作書報君淚如水

次日復寄何勳臣兼訊蓬萊翁丹麓

何子平日不好武恂恂書生莫敢侮一朝忽得教外傳
兩臂如鐵力如虎我恨不能親見之我友書來喜欲舞
男兒既生天地間衛霍功名那足數方今黔楚猶負隅
王師所到當盡誅千金寶刀百金馬自天而下如催枯
國家枚卜曾有無吾子何不身荷戈勒名畫閣本常事封侯
起第非異圖此輩攻心爲上耳盜賊從來亦赤子耕田
鑿井千百年不爲誅求豈至此昆蟲尙欲來其生困獸

何須致之死白起坑卒災逮身李廣殺降恨沒齒雲南
萬里維荒陬鄉村處處祠武侯遺營故壘起恭敬蔓菁
尙說諸葛酋強剗婦女餉戰馬戲擲嬰兒承戈矛明季
張李無人理天威何肯輕相仇可惜故人今衰老露布
竟難下馬草惟望早晚聞捷書一杯醺醺便醉倒蓬萊
進士今健不蟋蟀秋風聽不了如何不封萬戶侯海外
灰心蜉蝣島

朝上蓬萊山

朝上蓬萊山六合無纖塵仙人冠珠玉腰佩金麒麟瓊

林何鬱鬱宮闕皆白銀殘碑及敗瓦光耀驚四鄰仙人
見我笑子亦山中人琪花不勤掃帝謫南海濱收拾瓦
礫去世間能濟貧飄然不一顧笑者迴生嗔暮歸但空
手北山行負薪長鯨二千丈橫據東南津掉尾失雄劍
張目無日輪羣從幾百萬奮怒揚鬚鱗長跪告鯨魚鯨
魚寧不仁富貴與貧賤此義難具陳

有客上泰山

有客上泰山山中富竹素其字皆鳥跡上古無人註青
蓮曾得之一時尙不悟仙人甚珍惜重重扇鏤固遺以

千卷多光輝在道路下士不得見盡疑是泉布穿限爭
相求不與或勃怒鍾繇槌心胸遂發韋誕墓馬援無明
珠恐爲薏苡誤黃金餘五車仙人豈肯顧開篋君細看
茫茫走書蠹

將詣悟一草亭先簡張金門

詩情隨落葉直到草亭前魚上清江水鴉翻老樹烟短
牆宜對竹曲几好聽泉祇恐張夫子嫌人攬晝眠

紀夢

上山種松栢霜雪不敢欺下山樹桃李春雨徒榮滋桃

李尚自可荆棘非所宜昨宵倚枕臥壯心空自知夢見
古仙人爲我鞭雲螭雲螭我之馬仙人我所師俄頃到
天上不怕罡風吹螭角兩瓶酒一笑傾幾卮半醉撫星
斗欲摘光離離天鷄忽先叫日挂扶桑枝仙人舍我去
不覺淚漣漣孔遽年五十同是知非時庸愚天賦與五
十已過之黃金不可作此身將何爲

紅葉和董勿軒

朝在城頭看紅樹彩雲如向鏡中遇夕來江畔坐草亭
丹楓林外山青青何人海底沈大網挂得珊瑚逕萬丈

鐵鑄如意隨指揮擊碎亂擲此山上扶桑若木安足珍
一笑直欲摧爲薪放出火輪上霜葉作意娛我亭中人
亭中人物最瀟灑新詩償罷負酒債笑殺當年米襄陽
秋山祇作潑墨畫

石笏歌

晉州西山何平遠不作逢岑與絕巘芒鞋竹杖時來遊
一杯濁酒日晚晚山間有石殊可珍細看如桓復如信
土人云是爲石笏垂帶搢之此山神天錫山神侯職崇
對揚殿陛偕三公下土庶事密於織以備遺忘名臣風

疑有平日書思字捫石强尋無一二山神禮不應唯阿
蟲文辭蝕讀難識我聞魏公貞觀初俊物龍比還不如
其家子孫寶公笏比於珪璋與璠瑜又聞段公擊朱泚
一笏光輝照青史至今不數令公家朝罷歸來滿床第
嗚呼爾公與爾侯萬古榮辱皆自求民愚不知天上事
神兮無遺石笏羞

寤一草亭歌爲董勿軒賦

龍山詩人死已久蠹餘殘編懼速朽金門大隱不爲詩
旁瞻遠矚但蹙首若無草亭董勿軒使我何時痛飲酒

勿軒逸氣如青蓮，禽中鸞鶴人中仙。勿軒愁緒杜陵老，
看雲步月時憂煎。一醉卽書數十紙，紙紙光芒燭天起。
尙云盡是隨手成，不知力索更何似。官中自古嫉美人，
地上繫誰愛名士。假令我贖龍山死，豈知草亭有吾子。
草亭昨夜詠明月，碧海深沈句清絕。秋山不許用白描，
勿軒又向亭前賦紅葉。紅葉明月原不殊，一草亭耳無
處無。試問雕甍綺疏裏，授簡濡毫有是乎。

野鷹

木落草枯霜天曉，寒烟蒼蒼白日暎。不知何處來秋鷹，

猛健禽中似者少盤空視下雄風生平原雉兔眼了了
惜哉所志在一飽不爲人間擊妖鳥妖鳥得意爭喧呼
聲如兒啼每呱呱白晝羣飛集大屋屋底無人敢輕逐
少婦紅裙老儒巾女巫雜沓憑鬼神公然少牢饗鐘鼓
殺鷄磔狗不足數社鬼廟樹紛雲屯神旣醉也巫起舞
孤鳳南翔淚如雨

神鷹

千年老狐倚城郭鵲鷗高飛鵬鳥樂東郊獵犬不得力
人間氣色日蕭索大海長風萬里遙吹送神鷹下赤霄

赫然一怒卽文武須臾六合分鸞臬去已不顧更高妙
功成受賞付一笑至今想見奮擊時雙爪未到眼先到
魯連高風不可聞公子誰是信陵君養人養鷹徒云云
神鷹之神無與羣

與故人飲酒

雨中尙有故人過今夕何能不嘯歌杯凸只嫌斟酒淺
韻寬偏喜得詩多井梧枝老添松檜籬菊殘補薜蘿
風味依然如舊日蓬門無事笑張羅

下龍洞

陽暮山麓二石洞上如重屋下如甕甕中顧視天光微
怪物猙獰鬼戲弄有神在上如侯王高冠大帶何煌煌
佳人並坐美如玉珠翠盈頭衣袂香孔雀屏風豹皮褥
繡幕芙蓉雙鳳凰出入乘龍驂鸞鶴恩喜威怒無故常
長鬚赤脚不中用侍從虬髯皆怒張座後一水流洋洋
桔槔十車難度量山前瘠田幾百頃吝惜涓滴滋稻梁
衝浪翻波負盛氣欲與江河爭混茫有愚者氓苦日暍
濯足其中懼不祥良醫投藥石投水撞鐘伐鼓來中堂
少年女巫知神意再拜享以柔毛羊從此水中不敢唾

降災錫福司一鄉我曾上洞恣遊覽上出重霄下入窗
有時身作蛇腹行左衝右突無不敢歸來猶恨半道止
未曾賣勇探其底似此惟當燃靈犀照之使慚逐之徒
寸魚尺龜俱不生何爲空負一洞水

石蟾蜍歌

石蟾蜍土人視爾土不如不知乃是萬古之月魄願免
譴之謫下千年餘頭上嶷嶷有兩角領下八字丹所書
既不學貴人門前雙青獅百年唾溺相加遺復不學道
旁巖巖負穹碑鐫功鏤銘多愧辭吁嗟蟾蜍空爾悲我

今置爾山房下笑問黃虬何爲者一樹碧梧影沈沈
月瑤琴知此心

母親生日恭賦

母年七十有二矣拜謝

皇天錫福祉家室團樂

身安康縱不卽富亦足喜彩雲縹緲吹仙風金簫玉管
來雲中羣仙翱翔雙鳳下明嫺昨夜當晴空再拜登堂
何所祝阿母千年介景福小兒已逾知非時平生事業
計已熟不願身作看財奴黃金白玉相歡娛亦不願作
任俠客拔刀躍馬爭喧呼但願長作文學飲日日高歌

夜安寢有夢不離茅茨廬東山石頭方於枕阿母一願
一輒然人生何必拔宅升青天有子如此亦不惡與汝
優游過百年阿兄聞之却微笑亦不願汝職樞要阿母
已老諸弟貧我與仙人舊有約願二頃田種稻梁舂米
如雪盛竹筐更願梅花植千樹年年此日花下晉一觴
兒孫板輿相扶將曾元綵衣粲成行使我忽憶在東國
羣黎上壽躋堂北老翁扶杖升賓筵騎竹兒童席地食
婦孺後至紛如雲再拜門外頌功德當時道遠未及迎
阿母無由動顏色今朝真荷
皇天慈門闌喜氣

盈白眉興誦屏風展讀罷整容自續南山詩

憶董勿軒草亭紅葉寄張金門

草亭無錦屏天與紅葉樹仙人曾次開吞吐生雲霧清
酒招友生金烏愁遲暮歸來在眼前夢中如或遇火輪
飛海隅照見五色露斜日下江皋赤虹奔相赴主人一
詩成燦如黃金鑄衆賓苦推敲斤斤恐傷固譬彼元鶴
毛何如丹鳳羽紅燭生光芒驚醒失奇趣故人迫饑寒
不得時同去上世衣木葉何必工織布天孫裁錦裳豈
是機上素安得好鍼線縫此遺婦孺窮簷盡生春我亦

歌五袴此事不可爲且當索好句

冬至日寄次孫仙保

朝日煖於火鵲噪中庭樹遙念我孫子半年河西去當
堦栽麗春翠若青鳳羽二月花開時輕盈承曉露携汝
立花間教汝好詩句子誦我心歡不誦亦不怒汝今長
幾許記詩定無數及早當歸來與汝領少趣梧桐葉已
落芭蕉尙欲吐登樓看晚山蒼蒼橫烟霧

過寤一草亭

怪我時來此吾州一草亭平分揚子宅數擬太元經有

句吟紅葉無言對白丁不妨千日飲醉看衆人醒

過南山下張金門種田處

吾友種田處雲山自幽迴淺淺隔一水遂與俗客梗
杖過小橋水清照見影紅葉如桃花飛下北山嶺

和董勿軒報楊鳳池贈端溪石硯詩

楊名淳

迤西楊鳳池迤東董勿軒萬里雲南有二子彩鸞文鸞
雙騰鸞楊家端溪一片石麝煤兔毫拒生客世間唯有
董可貽駟馬義不先拱璧今朝見此星之精鸞鵠巨眼
何青青寒瓊積鐵紙束筍形影相隨在草亭

賢下明詔左掖右垣置清要拾遺補闕臣所司皦日不
負平生約有時當殿裂白麻青詞只辱學士家外國干
金索諫草姓名不獨雞林誇兒童走卒快先識唯汝硯
也與有力玳瑁裝匣翡翠嵌萬古餘香蘊殘墨聲價何
減心太平道士湫底蛟龍驚始信楊君有真賞物白可
重人非輕我家舊硯亦不俗歲久微凹磨未足恨無玉
人手纖纖金餅汲水銀河曲爲我深深添硯池細寫蜀
絹闌烏絲和君此詩君莫笑百物遭逢皆有時

吳冬秀過舍戲作

萬里長空驟鐵馬蒼鷹橫擊鳥亂下吳生昂昂從東來
一時意氣何壯哉入門長揖卽上坐鼻間呼吸生風雷
君固孱弱書生爾幾許不見乃如此前年馳馬過新城
腰弓臂劍真縱橫今秋邂逅晚江上醴筵弄兵相戲爭
君如鉅鹿恣酣戰壁上諸侯目盡眩我如房琯陳陶斜
四萬士平無一殿安能蓄銳屯糟邱重整旗鼓上酒樓
歸來但欲掩關坐賦詩却敵爭上游問君將兵能多少
褒鄂英姿在雲表雍容俎豆爲師儒男兒封侯志未了
宮牆數仞窺亦難知有苜蓿長闌干飼秣堪肥大宛種

先生未可供盤餐

時吳將補學官

梅花

春風猶未到江干
驢背清吟酒興闌
似有人時轉孤潔
縱無花處亦高寒
月來小閣悲誰語
雪下空山好獨看
笑我一琴兼一鶴
相思昨夜倚欄杆

吳冬秀舉子

吳生今年三十五
循循宮牆佩章組
微官不稱高才居
黃氣何爲見眉宇
一笑示我懷中詩
有子行將跨其父
仲秋之月月在西
五色騰雲繞庭戶
東鄰老人聽啼聲

西家生兒是申甫古言多累由多男又言但願愚且魯
是皆戲耳且近腐丈夫不得及身爲三公四海八荒作
霖雨此憾終須兒孫補况君足跡周寰區王侯將相半
目睹我有二子均凡庸有孫亦欲邁乃祖若不教讀五
車書便將使挽十石弩安能不文復不武年少科第策
天府作詩相賀非阿諛百里占有德星聚湯餅不與遲
試周左戎右印看雙取

晨歸

清晨足霜露常恐霑裳衣及此半輪月緩緩來柴扉

吠聲旋止家人知客歸轉悔十年別目斷孤雲飛

義鵲行

元鶴巢珠樹自惜好毛羽不飛亦不啄清唳徹元圃野
鷹何族類意欲橫相苦饑餓同長蛇利爪似猛虎不知
仙人騎竟作小鳥伍義鵲來九天見之赫然怒六翮才
一揮鷹已墮下土朝爲螻蟻食暮爲狐狸侮黃雀捕螳
螂貽笑尙千古彼昏自可憫縱死亦何補此事非傳聞
鄉村萬目睹我續義鵲行庶幾上樂府

對梅花

大雅非異人人世自隣俗羣芳故不發梅花豈願獨請
看東牆隅冉冉數竿竹

欲將花比人恨人不如玉靜後香時來淡中色自足娟
娟一片月與君共信宿

抱孫樓歌

蜚廉桂館何處求空從鰲背望瀛洲先人城北買夏屋
墻東向河營菟裘閭闔高門廣第宅徵歌選妓相嬉遊
陋儒蕭然守環堵抱孫娛母時登樓梧桐已是百年樹
芭蕉手種清且脩憑欄東南好山色初烟晚景囊中收

人生樂事本易足羽人豈必仍丹邱妄言黃小不解事
願上青天騎龍虯廣寒宮中間玉兔乞取大藥將金甌
爾祖求仙二十載於今始識非良謀武皇何曾見王母
八公不洗淮南羞吾家卯金有舊業天祿高閣連雲浮
帝欲觀之遣太乙燃火夜照藜杖頭試看充棟是何物
他年長大須窮搜立功立言並不朽故里遺宅皆千秋
回思先人抱我日愴然不覺雙淚流願得長年奉母氏
看汝抱孫無所憂

牙痛

達生外其身齒牙豈金石已落二十餘再落亦不惜欲
落不落間頗足爲身厄詩成難嘯歌緘口謝嘉客所喜
舌尙存無妨廢乾腊昌黎豪傑士未免語刺刺香山真
達人棄此如陳迹辟彼齟齬年亦復奚損益委形還天
地我欲忍痛摘

寤一草亭北鄰失火及牆而止

北鄰一炬觸天起江水清深照見底鸚鵡鸚鵡都欲逃
風囿火返及牆止千篇詩草懸屋梁皎然星月爭輝光
雕鏤肝腎帝所惜肯令六丁下取將同井聚觀額手賀

數椽湫隘如斗大鬼神何心愛文章造物尙恐妨偃臥
是時主人正遊騁上八青雲萬丈嶺俯拾斗柄挹天漿
倒窺地維看日影歸來且喜草廬存太息鄰家餘燒痕
河澤猶當潤三族樾蔭何止周一園梵歌朝昏隔壁聽
一聲木魚間金磬焦頭爛額殊足多拜佛求僧毋乃佞
書生不解師樂巴嚶酒驚散神火鴉繞檻長畱止水月
當軒不碍春山霞寄語趙鬼休誦賦建章柏梁古有數
屋角鴟吻紛紛多試看茅茨如鐵鑄

星雲湖覆舟弔汪童子茂源之嗣子也

戊午立春
後一日

立春北風猶怒呖船頭直立湖水高神龍地逼不出入
長龜大鼈翻波濤舵公重錢輕性命落日昏黑向北榜
嗟爾行人真無辜左風右浪不能泳前船輕羽何翩翩
快意飛入海門灣橋畔停橈賣魚膾豈知後船重於山
兩岸人如堵牆立老翁太息嫠婦泣健兒袖手無一前
綠楊空繫好舟楫覆水九死希一生望見歸柁齊相爭
浪底疾呼山相應順風片帆自南行星雲魚鼈喜欲舞
肉肥骨瘦任吞吐梳頭祇餘一人存到岸泣訴淚如雨
同是溺淵可憐人汪家童子情相親纔對秋風哭老友

招魂又向春冰瀼羣生脩短亦時有聞道東陵獨黃耆
禍福茫茫無人知帝閭蒼蒼何處叩

遊華蓋山

西山落日常笑人十二萬年驚飛輪山風江月互相待
勞勞送舊爭迎新我固今之有情者獨倚危欄望大野
古仙墳墓春草生上有羸兒牧瘦馬寺僧嫉客如嫉仇
庭堦花發無時休亦知守歲餘五日乘暇尙欲重來遊
閑人世上不易有莫嗾信信吠客狗懸鐘剝落青莓苔
聳耳待聽蒲牢吼